

REGLUGERÐ

um námslán og námsstyrki.

I. KAFLI.

Hlutverk lánasjóðs íslenskra námsmanna.

1. gr.

Meginhlutverk sjóðsins.

Meginhlutverk Lánasjóðs íslenskra námamanna er að veita íslenskum námsmönnum fjárhagsaðstoð til framhaldsnáms við stofnanir er gera sambærilegar kröfur til undirbúningsmenntunar nemenda og gerðar eru til háskólanáms hérlandis.

Pegar umsókn berst um aðstoð skv. þessari grein til náms við stofnun þar sem eigi hefur áður verið veitt slík aðstoð kannar sjóðurinn hvort stofnunin fullnægir skilyrðum 1. málsgreinar. Jafnframt aflar hann upplýsinga um námsskipan og námstíma sem og um eftirlit af hálfu stofnunarinnar með árangri og ástundun námsmanna. Umsækjendum ber að aðstoða sjóðinn við slíka upplýsingaöflun eftir föngum.

2. gr.

Sérstök aðild sérskóla.

Nemendur eftirtalinna sérskóla eiga ennfremur rétt á aðstoð úr Lánasjóði skv. almennum reglum sjóðsins:

Fiskvinnsluskólinn, 3. og 4. ár.

Fósturskóli Íslands.

Hjúkrunarskóli Íslands.

Iðnskólar, framhaldsdeildir, 2. og 3. ár.

Íþróttakennaraskóli Íslands.

Leiklistarskóli Íslands.

Myndlista- og handíðaskóli Íslands.

Nýi hjúkrunarskólinn.

Stýrimannaskólar.

Tónlistarskólar: Tvö síðustu námsár kennaradeilda Tónlistarskólans í Reykjavík, svo og tónlistarnemar á 7. og 8. námsstigi skv. námsstigakerfi Tónlistarskólans í Reykjavík.

Tækniskóli Íslands, raungreinadeild og tækninám.

Vélskólar.

Proskapjálfskóli Íslands.

Nám á tæknifræðistigi og meinatækninám við Tækniskóla Íslands, svo og nám í framhaldsdeild Bændaskólans á Hvanneyri, er aðstoðarhæft samkvæmt 1. grein.

3. gr.

Tuttugu ára reglan.

Lánasjóði er heimilt að veita fjárhagsaðstoð öðrum en þeim sem falla undir 1. og 2. grein þessarar reglugerðar, enda hafi þeir náð 20 ára aldri á því almanaksári sem lán eru veitt og stundi sérnám. Nánari ákvæði um framkvæmt þessarar reglu eru sett í úthlutunarreglum. Meðal annars eru þar taldir upp helstu skólar og árgangar sem falla undir regluna á hverjum tíma.

4. gr.

Nám sem ekki verður stundað á Íslandi.

Auk þess sem tilgreint er í 1.—3. grein er Lánasjóði heimilt að veita fjárhagsaðstoð til náms erlendis, ef hliðstætt nám verður ekki stundað á Íslandi, enda sé um nægilega veigamikil nám að ræða, að því er varðar eðli þess og uppbyggingu, námslengd og starfsréttindi er það veitir.

5. gr.

Réttur erlendra námsmanna.

Námsmenn frá Norðurlöndum, sem heimilisfastir eru á Íslandi og stunda lánshæft nám hérlendis, njóta námsaðstoðar til jafns við íslenska námsmenn enda hljóti þeir ekki aðstoð frá heimalandi sínu, sbr. samkomulag milli Norðurlandanna um þessi efni eins og það er á hverjum tíma. Heimilt er að láta ákvæði þessarar greinar taka til einstakra annarra erlendra námsmanna sem eins er ástatt um og skal þá m. a. taka mið af réttarstöðu íslenskra námsmanna í viðkomandi landi. Einnig skal taka tilliti til þess hvort viðkomandi námsmaður hafi tekið sér fasta búsetu á Íslandi til frambúðar.

II. KAFLI.

Stjórn sjóðsins og skrifstofuhald.

6. gr.

Skipun stjórnar.

Um skipun stjórnar fer eftir 4. grein laga nr. 72/1982. Í forföllum formanns gegnir sá stjórnarmaður hlutverki hans sem skipaður er án tilnefningar.

7. gr.

Starfshættir stjórnar.

Ef atkvæði verða jöfn við afgreiðslu mála í stjórn sjóðsins sker atkvæði formanns úr. Ef ágreiningur er fyrisjáanlegur við afgreiðslu máls skal leitast við að afgreiða það á fullskipuðum fundi. Hjáseta einstakra stjórnarmanna við afgreiðslu máls breytir engu um hæfni fundarins til að ljúka því. Sjóðstjórn setur sér að öðru leyti fundarsköp eftir því sem þurfa þykir.

8. gr.

Hlutverk stjórnar.

Hlutverk sjóðstjórnar er m. a.:

1. Að hafa yfir umsjón með úthlutun námslána og almennra styrkja skv. þessari reglugerð.
2. Að skera úr vafamálum er varða einstaka umsækjendur og lánþega.
3. Að fylgjast með fjármálum sjóðsins og gera fjárhagsáætlanir.
4. Að þróa reglur Lánasjóðs um úthlutun, endurgreiðslur o. fl., m. a. með árlegri endurskoðun á reglunum.
5. Að skera úr öðrum málum, er almennt gildi hafa, m. a. með bókuðum samþykktum.
6. Að hlutast til um gagnasöfnun varðandi þörf námsmanna á opinberri aðstoð.
7. Að hlutast til um útgáfustarfsemi og aðra kynningu á starfsemi sjóðsins.
8. Að annast beina úthlutun á aukalánum og aukaferðastyrkjum skv. nánari ákvæðum í þessari reglugerð.
9. Að ráða starfsfólk sjóðsins að fenginni heimild ráðuneytisins, sbr. þó 9. grein. Framkvæmdastjóra er heimilt að lausráða fólk til tímabundinna verkefna.

9. gr.

Framkvæmdastjóri.

Ráðherra ræður framkvæmdastjóra sjóðsins til fjögurra ára í senn að fengnum tillögum sjóðstjórnar. Hann hefur yfirumsjón með öllum rekstri sjóðsins í umboði stjórnar og ráðherra. Framkvæmdastjóri situr fundi stjórnar með málfrelsi og tillögurétt.

10. gr.

Skrifstofa.

Skrifstofa sjóðsins starfa í umboði stjórnar. Hún sér um útreikning og úthlutun námsaðstoðar, en stjórn sjóðsins er heimilt að fela bankastofnun útborgun lána og styrkja, innheimtu vaxta og afborgana og aðra fésýslu. Bókhaldi skal haga skv. fyrirmælum ríkisbókhalds eins og þau eru á hverjum tíma. Árlegur rekstrarkostnaður greiðist af fé sjóðsins.

III. KAFLI.

Áætlanagerð.

11. gr.

Fjárlagatillögur.

Vegna fjárlagaundirbúnings gerir sjóðstjórn árlega fjárhagsáætlun fyrir næsta almanaksár með sama hætti og aðrar ríkisstofnanir. Sé þess þörf endurskoðar stjórnin þessa áætlun undir lok ársins á grundvelli nýjustu upplýsinga um verðlag og gengi í hinum ýmsu námslöndum, um fjölda lánþega og fleira sem kann að hafa breyst frá því að upphafleg áætlun var gerð.

12. gr.

Fjárhagsáætlun yfirstandandi árs.

Í upphafi hvers almanaksárs gerir sjóðstjórn fjárhags- og greiðsluáætlun með hiðsjón af fjárlögum. Þessi áætlun er lögð fyrir menntamálaráðuneytið til staðfestingar, sem og hugsanlegar síðari breytingar.

IV. KAFLI.

Umsóknir um námsaðstoð.

13. gr.

Auglýsingar.

Auglýsa skal með tryggilegum hætti eftir umsóknum um námsaðstoð frá sjóðnum. Í auglýsingu skal taka fram um hvaða flokka aðstoðar sé að ræða, hvar umsóknareyðublöð og önnur umsóknargögn séu fáanleg, hvenær umsóknarfrestur renni út, sem og annað það sem máli skiptir.

14. gr.

Dreifing umsóknargagna.

Eyðublöð fyrir umsóknir og fylgiskjöl þeirra, svo og upplýsingar um námsaðstoð sjóðsins, skulu jafnan vera fáanleg í íslenskum skólum þar sem aðstoðarhæft nám fer fram, sem og í sendiráðum Íslands erlendis.

15. gr.

Efni umsókna.

Sækja skal sérstaklega um aðstoð fyrir hvert aðstoðarár, sem miðast yfirleitt við 1. júní ár hvert. Umsóknir um almenn námslán og ferðastyrki skulu vera á eyðublöðum sjóðsins og skal þeim skilað til hans eða þau póstlögð áður en umsóknarfresti lýkur, ásamt tilskildum fylgiskjöllum. Eigi er veitt aðstoð til framfæris á tímanum áður en útfylltri umsókn er skilað, nema sérstakar aðstæður valdi seinkun umsókna og sjóðstjórn taki þær gildar. Verði breytingar á högum umsækjanda eftir að umsókn var lögð fram, ber honum að skýra sjóðnum frá þeim ef ætla má að þær hafi áhrif á ákvörðun um námsaðstoð. Aðstoð skal felld niður ef í ljós kemur að umsækjandi hefur vísitandi veitt sjóðnum rangar eða villandi upplýsingar.

16. gr.

Synjun umsókna.

Sé umsækjanda synjað um aðstoð sjóðsins skal honum skýrt frá því og ástæður tilgreindar.

V. KAFLI.

Ákvörðun og útborgun námslána.

17. gr.

Reglur um lán.

Til þess að tryggja samræmi í meðferð einstakra umsókna og sem besta nýtingu á ráðstöfunarfé Lánasjóðs setur sjóðstjórn reglur um það hvernig upphæð einstakra lána ákvarðast með hliðsjón af högum námsmanns, hvernig útborgun skuli hagað o. s. frv. Úthlutunarreglur, ásamt öðrum reglum sjóðsins, skulu gefnar út fyrir 1. júní ár hvert að fengnu samþykki ráðherra.

18. gr.

Námsframvinda.

Forsenda þess að námsmaður geti fengið aðstoð úr Lánasjóðnum er sú að námsframvinda hans hafi verið með eðlilegum hætti miðað við samræmt mat á kröfum hinna ýmsu skóla og námsbrauta. Í slíku mati skal gert ráð fyrir hæfilegu svigrúmi miðað við ýtrustu kröfur skóla eða námsbrautar. Ef þörf krefur ber námsmanni að leggja fram gögn um kröfur skólans í þessum efnum.

19. gr.

Sjö ára reglan.

Pegar námsmaður hefur fengið aðstoð sjóðsins sem svarar 7 aðstoðarárum og sækir enn um aðstoð ber honum að gera sérstaka grein fyrir námsframvindu sinni fram að þeim tíma og leggja fram áætlun um nám sitt þar til því lýkur. Er þá mál hans lagt fyrir sjóðstjórn. Frávik frá námsáætlun sem hefur áður verið samþykkt skv. 7 ára reglu skulu einnig lögð fyrir sjóðstjórn. Námsmaður sem skiptir algerlega um námsbraut á rétt á námsaðstoð í samtals 7 ár á háskólastigi, m. ö. o. skv. 1. grein þessarar reglugerðar og 1. gr. laga nr. 72/1982, enda hafi námsframvinda hans verið fullnægjandi á báðum námsbrautunum.

20. gr.

Tólf ára regla.

Að jafnaði getur enginn námsmaður fengið aðstoð úr sjóðnum til náms á háskólastigi lengur en í 12 aðstoðarár alls.

21. gr.

Ákvörðunaratriði um lánsupphæðir.

Í úthlutunarreglum skal m. a. tekið tillit til eftirfarandi atriða er varða hagi umsækjanda:

- Framfærslukostnaður á námsstað, sem breytist að öðru jöfnu með þróun verðlags og gengis. Sjóðstjórn fylgist einnig með því hvernig þessar tölur þróast í samanburði við launatekjur.
- Námskostnaður í viðkomandi námsgrein á námsstað.
- Lengd árlegs námstíma.
- Fjölskylduáðstæður námsmanns.
- Tekjur námsmanns og maka hans eða möguleikar á tekjuöflun, t. d. utan árlegs námstíma.

- f) Skattar sem námsmaður eða maki greiða á sama tíma og nám eða tekjuöflun fer fram.
- g) Aðstaða sem einhleypur námsmaður nýtur af hálfu foreldra eða kjörforeldra, t. d. húsnæði.
- h) Ferðakostnaður barna og maka.

Ovígð sambúð er í störfum sjóðsins lögð að jöfnu við hjúskap, ef sambúðaraðilar eiga sameiginlegt lögheimili og hafa átt barn saman eða konan er þunguð eða sambúðin hefur staðið samfleytt í 2 ár.

Í reglum sjóðsins skal á hverjum tíma gæta samræmis milli þess að hvaða leyti námsmanni telst skylt að framfæra maka sem getur ekki aflað tekna og þess sem tekjuhár maki telst leggja til framfæris námsmanns.

22. gr.

Útborgun námslána.

Námslán til námsmanna á Íslandi eru greidd með mánaðarlegum greiðslum. Lán til námsmanna erlendis eru greidd á þriggja mánaða fresti eða oftar.

23. gr.

Bráðabirgðalán.

Þegar sérstaklega stendur á er Lánasjóði heimilt að veita námsmönnum víxillán til bráðabirgða. Þau endurgreiðist þá annaðhvort í reiðufé eða með endanlegri námsaðstoð eftir að hún hefur verið ákveðin.

24. gr.

Aukalán.

Sjóðstjórn er heimilt að veita námsmönnum, er stunda aðstoðarhæft nám, aukalán umfram almenna aðstoð sjóðsins, þegar sérstaklega stendur á og þeir sækja um slíka aðstoð bréflaga. Lán þessi eru veitt með sömu kjörum og almenn lán.

IV. KAFLI.

Námsstyrkir.

25. gr.

Ferðastyrkir.

Lánasjóður veitir árlega svokallaða ferðastyrki þeim námsmönnum sem stunda aðstoðarhæft nám fjarri heimili sínu innan lands eða utan. Upphæð ferðastyrkja er ákveðin skv. ferðakostnaði milli námsstaðar og lögheimilis, en réttur námsmanns til styrksins er óháður því hvort hann fer slíka ferð eða ekki. Heimilt er skv. nánari reglum að fella niður eða skerða rétt til ferðastyrkja ef umsækjandi hefur mun meira ráðstöfunarfé en almennir námsmenn er njóta annarrar aðstoðar Lánasjóðs.

26. gr.

Aukaferðastyrkir.

Sjóðstjórn er heimilt að veita námsmönnum erlendis aukaferðastyrki ef þeir taka sér íslensk verkefni í námi sínu og þurfa nauðsynlega að takast á hendur ferð til Íslands af þeim sökum, utan leyfistímabila.

VII. KAFLI.

Endurgreiðslur námslána.

27. gr.

Skuldabréf.

Peir sem fá lán úr Lánasjóði undirrita skuldabréf til viðurkenningar á teknum lánum. Skulu þeir þá leggja fram viðurkenningu eins manns sem tekur að sér sjálfskuldarábyrð á endurgreiðslu lánsins ásamt verðtryggingu þess. Sjóðstjórn ákveður í reglum Lánasjóðs hvaða skilyrðum ábyrgarmenn skuli fullnægja. Ábyrgð þeirra getur fallið niður eftir að fyrsta greiðsla hefur verið innt af hendi, enda setji lánþegi þá aðra tryggingu fyrir lánum, sem sjóðstjórn metur fullnægjandi.

28. gr.

Verðtrygging.

Lán úr sjóðnum eru verðtryggð miðað við lánskjaravísitölu Seðlabankans, sbr. lög nr. 13/1979. Verðtryggingin reiknast annars vegar út frá vísitölu næsta mánaðar eftir að námsmaður tekur við greiðslu og hins vegar út frá vísitölu þess mánaðar er greiðsla fer fram. Ef endurgreiðsla dregst fram yfir gjalddaga er heimilt að reikna með dráttarvöxtum eða van-skilavöxtum innan hvers mánaðar skv. almennum venjum þar um.

29. gr.

Námslok.

Endurgreiðsla námslána hefst þremur árum eftir námslok. Sjóðstjórn skilgreinir nánar í reglum sjóðsins hvað telja beri námslok í þessu samhengi. Þegar vafi leikur á því skal m. a. tekið tillit til þess hvort námsmaður hefur byrjað fullt starf á almennum vinnumarkaði.

Ári eftir námslok skal námsmanni tilkynnt upphæð heildarskuldar miðað við tiltekna lánskjaravísitölu, og ber honum þá að gera athugasemdir ef einhverjar eru, t. d. vegna skilgreiningar á námslokum.

30. gr.

Föst árgreiðsla.

Árleg endurgreiðsla af skuldabréfi ákvarðast í tvennu lagi. Annars vegar er föst árgreiðsla og er gjalddagi hennar 1. mars ár hvert. Upphæð hennar er kr. 1200,00 miðað við lánskjaravísitölu 135, nema eftirstöðvar lánsins ásamt verðbótum séu lægri en því nemur, en þá ber lánþega að greiða lán sitt að fullu á fyrrnefndum gjalddaga. Krónutala fastrar árgreiðslu breytist á hverju ári miðað við lánskjaravísitölu í janúar.

31. gr.

Viðbótargreiðsla.

Viðbótargreiðsla miðast við ákveðinn hundraðshluta af útsvarsstofni næsta árs á undan endurgreiðsluári. Hundraðshluti þessi er 3,75% margfaldaður samkvæmt hlutfallslegri breytingu á lánskjaravísitölu frá 1. júlí á tekjuöflunarári til 1. júlí á endurgreiðsluári. Frá þessum hundraðshluta af útsvarsstofni dregst fasta greiðslan sem lýst er hér á undan. Gjalddagi viðbótargreiðslu er 1. september ár hvert.

32. gr.

Nám hafið að nýju.

Nú byrjar lánþegi lánshæft nám að nýju eftir að fyrra námi telst lokið skv. 29. gr. um námslok. Er þá heimilt að veita honum undanþágu frá endurgreiðslum af fyrri skuld meðan síðara námið stendur yfir, sbr. 36. grein. Námsmanni reiknast síðan önnur heildarskuld

vegna síðara námsins og fer um greiðslur af henni eins og um sjálfstætt lán væri að ræða nema hvað heildargreiðslur á hverju ári skulu aldrei vera meiri en kveðið er á um í 30. og 31. grein og vikur greiðsla af síðari skuld þá fyrir greiðslu af fyrri skuld þar til hún er að fullu greidd.

33. gr.

Lok endurgreiðslna.

Ef lán er ekki að fullu greitt 40 árum eftir að endurgreiðslur hófust af viðkomandi heildarskuld, eru eftirstöðvar lánsins óafturkræfar nema til komi vanskil eða vantaling tekna, sbr. 42. grein.

34. gr.

Fimm ára reglan.

Nú reiknast lánþega svo há viðbótargreiðsla einhvern tímann á fyrstu fimm árunum eftir að greiðslur hefjast, að hann mundi greiða lán sín að fullu á fjórum árum alls eða skemmri tíma, ef raungildi viðbótargreiðslunnar héldist óbreytt framvegis. Skal þá lækka viðbótargreiðslu hans niður í það mark sem dugir til þess að greiðslu mundi ljúka á 5. ári að óbreyttu raungildi viðbótargreiðslunnar, miðað við lánskjaravísitölu. Föst greiðsla skerðist hins vegar ekki af þessu ákvæði.

35. gr.

Undanþágur vegna beytinga á högum.

Nú gefur útsvarsstofn vegna tekna á fyrra ári ekki rétta hugmynd um fjárhag lánþega á endurgreiðsluári, vegna skyndilegra og verulegra beytinga sem hafa orðið á högum hans milli ára, t. d. ef hann veikist alvarlega eða verður fyrir slysi er skerðir til muna ráðstöfunarfé hans og möguleika til að afla tekna. Ef lánþegi gerir skriflega grein fyrir þessum breyttu högum sínum og styður hana tilskildum gögnum, er sjóðstjórn heimilt að veita undanþágu frá árlegum endurgreiðslum skv. 30. og 31. grein, ýmist til lækkunar eða niðurfellingar á greiðslum, eftir atvikum.

36. gr.

Undanþágur vegna varanlegra fjárhagsörðugleika.

Námsmaður sem hefur haft svo lágar tekjur á fyrra ári að honum reiknast ekki viðbótargreiðsla skv. 31. grein, og fjárhagur hans hefur ekki batnað á endurgreiðsluárinu, getur sótt um undanþágu frá fastri árgreiðslu skv. 30. grein, ef nám, atvinnuleysi, veikindi, þungun, umönnun barna eða aðrar sambærilegar ástæður valda þessum örðugleikum hjá lánþega eða fjölskyldu hans. Skal hann þá leggja fyrir sjóðstjórn upplýsingar um eignir sínar, lífeyri og annað það sem stjórnin telur máli skipta. Stjórninni er þá heimilt að veita undanþágu að hluta eða öllu leyti eftir atvikum. Sjóðstjórn setur smám saman nánari almennar reglur um framkvæmd þessa heimildarákvæðis.

37. gr.

Örari endurgreiðslur.

Lánþega er heimilt að endurgreiða lán örar en fyrir er mælt í 30. og 31. grein og reiknast þá raungildi umframgreiðslunnar í samræmi við lánskjaravísitölu þegar greiðslan fer fram.

38. gr.

Dánarbú.

Endurgreiðslur sem falla í gjalddaga eftir að lánþegi andast falla sjálfkrafa niður. Hugsanlegar kröfur sjóðsins í dánarbú geta því eingöngu snúist um fyrri endurgreiðslur.

39. gr.

Lögtök.

Endurgreiðslur af námslánnum eru lögtakskræfar ef um vanskil er að ræða, þar á meðal eftirstöðvar sem felldar eru í gjalddaga vegna vanskila.

40. gr.

Áætlaður útsvarsstofn.

Sé lánþega áætlaður útsvarsstofn skal miða árlegar endurgreiðslur við hann. Komi í ljós innan þeirra tímamarka er getur í 1. mgr. laga nr. 40/1978 að útsvarsstofn hafi verið of hátt áætlaður eða oftalinn og lánþegi því innt af hendi of háa greiðslu skal honum endurgreitt það sem ofgreitt er með þeim vöxtum sem á hverjum tíma eru reiknaðir af venjulegum sparisjóðsinnistæðum.

41. gr.

Lánþegi skattskyldur erlendis.

Sé lánþegi á endurgreiðslutímanum ekki skattskyldur á Íslandi af öllum tekjum sínum og eignum skal honum gefinn kostur á að telja fram tekjur sínar til Lánasjóðs íslenskra námsmanna og styðja það framtal viðeigandi gögnum um skattamál sín erlendis. Er þá endurgreiðslum hagað í samræmi við það. Geri hann þetta ekki eða telja verði framtal hans ósennilegt og ekki nægilega staðfest, skal áætla honum ríflegan útsvarsstofn til útreiknings á árlegri viðbótargreiðslu.

42. gr.

Vanskil.

Verði veruleg vanskil á endurgreiðslu námslána er sjóðstjórn heimilt að fella allt lánið í gjalddaga. Sama gildir ef tekjur hafa verið vantaldar til skatts og viðbótargreiðsla skv. 31. grein orðið lægri af þeim sökum en vera bar. Hækkun á viðbótargreiðslu vegna leiðréttingar á framtali er gjaldkræf þegar í stað ásamt hæstu lögleyfðu dráttarvöxtum frá réttum gjalddaga. Fimm ára reglan í 34. gr. á ekki við um þessa hækkun.

VIII. KAFLI

Ýmis ákvæði.

43. gr.

Upplýsingaskylda lánasjóðs.

Almennar upplýsingar, sem tengjast ekki einstökum lánþegum eða umsækjendum, eru öllum opnar eftir því sem tök eru á að afla þeirra hverju sinni. Einnig er framkvæmdastjóra sjóðsins heimilt að veita upplýsingar um nöfn og heimili þeirra sem fá aðstoð úr sjóðnum á hverjum tíma, skráða námsgrein þeirra og námsstofnun. Aðrar upplýsingar sem sjóðurinn býr yfir teljast einstaklingsbundnar og eru meðhöndlaðar sem trúnaðarmál sem eru eingöngu aðgengileg starfsfólki sjóðsins og stjórn, svo og námsmanni sjálfum og umboðsmanni hans, að því er hann sjálfan varðar. Skal stjórn og starfsfólki á hverjum tíma kynnt hvað í þessu felst. Námsmaður fellst með umsókn sinni á ofangreinda meðferð upplýsinga er hann varða.

44. gr.

Upplýsingaskylda annarra stofnana.

Innlendum námsstofnunar þar sem aðstoðarhæft nám er stundað er skylt að láta Lánasjóði í té nauðsynlega aðstoð við framkvæmd þessarar reglugerðar, þar á meðal upp-

lýsingar um námsframvindu umsækjenda. Skattstjórum er skylt að láta Lánasjóði í té upp-
lýsingar sem nauðsynlegar eru við framkvæmd laga um námslán og námsstyrki.

45. gr.

Ársreikningar.

Ársreikningar sjóðsins skulu samþykktir af sjóðstjórn og endurskoðaðir af Ríkisend-
urskoðun. Þeir skulu birtir í Stjórnartíðindum.

46. gr.

Félagsgjöld SÍNE.

Meðan stjórn Sambands íslenskra námsmanna erlendis óskar þess innheimtir Lána-
sjóður félagsgjald til samtakanna af lánþegum er stunda nám erlendis.

47. gr.

Gildistaka.

Reglugerð þessi er sett skv. 16. grein laga nr. 72/1982, um námslán og námsstyrki, og
öðlast þegar gildi. Jafnframt fellur úr gildi reglugerð nr. 347/1976 með áorðnum breyting-
um. Um endurgreiðslur af lánum sem veitt hafa verið skv. fyrri lögum og reglugerð fer skv.
ákvæðum skuldabréfs svo langt sem þau ná en að öðru leyti er heimilt að beita ákvæðum
þessarar reglugerðar, og reglum sem settar verða skv. henni, t. d. um undanþágur.

Ákvæði til bráðabirgða.

1. Hundraðshluti árlegrar endurgreiðslu.

Hundraðshluti árlegrar endurgreiðslu skv. 31. grein skal vera 3,5% ef námsmaður hefur
fengið meira en helming af raunvirði námslána sinna fyrir 1. janúar 1984, þegar hlutfall lána
af reiknaðri fjárförf námsmanna nær 100%.

2. Endurgreiðslur skv. fyrri lögum.

Ef námsmaður sem hefur tekið lán skv. þessari reglugerð er jafnframt að inna af hendi
greiðslur skv. eldri lögum og reglugerðum, skal árleg heildargreiðsla hans eigi vera hærri en
það sem hærri er, heildarárgreiðsla skv. eldri ákvæðum eða heildargreiðsla skv. þessari
reglugerð. Þessi heildargreiðsla bókfærast þannig að greiðsla skv. þessari reglugerð víkur
fyrir greiðslu af fyrri skuld.

Menntamálaráðuneytið, 7. október 1982.

Ingvar Gíslason

Birgir Thorlacius